

26  
7. febr.

## AUGLÝSING

um breyting á erindisbréfi fyrir fiskimatsmenn, nr. 71 3. júlí 1933.

Fyrsti málsliður 5. gr. erindisbréfsins orðist svo:

Fyrir vinnu sína fá fiskimatsmenn ákveðið kaup um hverja klukkustund. Sé það miðað við almennt verkkaup, sem um er samið milli atvinnurekanda og verkamanna í þeim bæ eða héraði, sem fiskimatsmaður er búsettur í, eða það kaup, sem kann að verða lögboðið, að viðbættu 40% uppbót á hin almennu vinnulaun á hverjum tíma. Þetta kaup fá þeir fyrir alla vinnu við fiskimat, hvort sem það er við flokkun fisksins, umsjón með vigtun hans, útskipun, hleðslu eða annað.

*Atvinnu- og samgöngumálaráðuneytið, 7. febrúar 1941.*

**Ólafur Thors.**

*Páll Pálmason.*

27  
25. febr.

## REGLUGERÐ

um sérstakan tímareikning.

Samkvæmt lögum nr. 8 16. febrúar 1917, um heimild handa ráðuneytinu til ákvörðunar sérstaks tímareiknings, eru hér með sett eftirfarandi ákvæði:

Frá og með 2. marz 1941, þar til öðruvísi kann að verða ákveðið, skal hafa sérstakan tímareikning á Íslandi, þannig, að klukkan verði færð fram um eina klukkustund frá svonefndum islenzkum meðaltíma.

Þetta kemur til framkvæmda þannig, að klukkan eitt eftir miðnætti eftir islenzkum meðaltíma aðfaranótt sunnudagsins 2. marz, færist klukkan fram um eina klukkustund og verður tvö.

*Í dóms- og kirkjumálaráðuneytinu, 25. febrúar 1941.*

**Hermann Jónasson.**

*Gústav A. Jónasson.*

28  
25. febr. Staðfesting ráðuneytis Íslands, handhafa konungsvalds, á skipulagsskrá fyrir „Drykkjumannahælistjóð Jóns Pálssonar og Önnu Sigríðar Adolfsdóttur“, útgefin á venjulegan hátt að mandatun af dóms- og kirkjumálaráðherra 25. febrúar 1941. Skipulagsskráin er þannig:

## SKIPULAGSSKRÁ

fyrir Drykkjumannahælistjóð Jóns Pálssonar og Önnu Sigríðar Adolfsdóttur.

1. gr.

Sjóðurinn er stofnaður af Jóni Pálssyni, fyrrv. bankagjaldkera, og konu hans, Önnu Sigríði Adolfsdóttur, til minningar um látna foreldra þeirra beggja, Pál hreppstjóra Jónsson, bónda að Syðra-Seli í Stokkseyrarhreppi, og konu hans, Margrėti

ljósmóður Gísladóttur, sama staðar, og Kristinn Adolf Adolfsson, bónda og formann á Stokkseyri, og konu hans, Ingveldi Ásgrímsdóttur, sama staðar.

28  
25. febr.

### 2. gr.

Sjóðurinn heitir Drykkjumannahælisjóður Jóns Pálssonar og Önnu Sigríðar Adolfsdóttur.

### 3. gr.

Stofnfé sjóðsins er tilfallnir og tilfallandi vextir af 20 þúsund króna gjöf, er fyrrnefnd hjón gáfu með gjafabréfi 17. maí 1939, til þess að reisa drykkjumannahæli. Skulu allir vextir af gjöf þessari renna í sjóðinn, þar til gjöfin verður notuð til hælisyggingar. Enn fremur tekur sjóðurinn við gjöfum og áheimum.

### 4. gr.

Sjóðurinn skal vera í vörzlum þeirrar deildar Stjórnarráðs Íslands, er heilbrigðismál heyra undir og ber að ávaxta fé hans á sem tryggilegastan hátt.

### 5. gr.

Höfuðstól sjóðsins má aldrei skerða. Leggja skal alla vexti við höfuðstólinn þar til hann er orðinn 10 þúsund krónur. Þegar höfuðstóllinn hefur náð þeirri upphæð má nota hálfu vexti til úthlutunar árlega, en þegar sjóðurinn er orðinn 50 þúsund krónur má úthluta úr honum  $\frac{3}{4}$  hlutum árlega í því skyni, er segir í 6 gr. En þegar sjóðurinn er orðinn 100 — eitt hundrað — þúsundir króna, má úthluta  $\frac{1}{10}$  — níu tíundu — hlutum vaxtanna.

### 6. gr.

Styrkir úr sjóðnum skulu einvörðungu notaðir til hjálpar bágstöddum konum og börnum manna þeirra, er í hælið kunna að fara, án þess þó að styrkveitingar þessar nokkru sinni eða á neinn veg dragi úr öðrum styrkveitingum eða framfærslu þeim til handa og veittar verða konum þessum og börnum annars staðar frá, t. d. nauðsynlegur sveitarstyrkur, sjúkrahjálparkostnaður, aukin atvinna, örorkubætur, eða annað þvílíkt, er þau kunna að eiga tilkall til samkvæmt lögum. Sjóðurinn tekur ekki til starfa fyrr en drykkjumannahælið hefur verið reist.

### 7. gr.

Komi til þess, vegna aukinnar menningar í landinu, að drykkjumannahælisjóður teljist óþarfur, þá skal sjóður þessi, samkvæmt nánari ákvörðun stjórnar sjóðsins, renna til slysavarna á sjó eða landi og bera nöfn gefendanna.

### 8. gr.

Þegar sjóðurinn tekur til starfa, skal stjórn hans skipuð fimm mönnum: 1) Skrifstofustjóra þeirrar deildar stjórnarráðs Íslands, er heilbrigðismál heyra undir; 2) borgarstjóra Reykjavíkurbæjar; 3) einum manni kosnum af Stórstúku Íslands I. O. G. T; 4) einum manni kosnum af Landsstórstúku Íslands I. O. O. F.; 5) lækni drykkjumannahælisins. Taka þeir sæti í stjórninni nú þegar og hafa íhlutun um það, hvar og hvenær hælið verður reist og aðalfjárhæðin (20 þús. krónurnar) skuli notuð. Meðan læknir hælísins er eigi ráðinn eða skipaður, tekur landlæknirinn yfir Íslandi sæti í stjórninni og heldur hann því sæti, unz læknir hælísins er ráðinn eða skipaður.

Stjórnin vinnur kauplaust.

### 9. gr.

Stjórn sjóðsins ber að halda gerðabók fyrir sjóðinn og færa í hana skipulagskrána, fundarsamþykktir, styrkveitingar og annað, sem varðar hag og rekstur sjóðs-

28 ins. Sjóðstjórninni ber enn fremur að færa bók yfir eignir sjóðsins, tekjur og gjöld 25. febr. hans, og færa í hana ársreikninga sjóðsins.

## 10. gr.

Reikningsár sjóðsins skal vera almanaksárið, og skal reikningur gerður í marz-mánuði ár hvert og reikningurinn birtur í Lögbirtingablaðinu.

## 11. gr.

Leita skal konungsstaðfestingar á skipulagsskrá þessari og hún birt í B-deild Stjórnartíðindanna.

Reykjavík, 23. febrúar 1941.

Jón Pálsson. Anna S. Adólfsdóttir.

29

4. marz

**REGLUGERÐ****um skemmtanaskatt í Bólstaðarhlíðarhreppi í Húnavatnssýslu.**

## 1. gr.

Samkvæmt lögum nr. 34 frá 22. nóvember 1918, sbr. lög nr. 30 19. júní 1922 og lög nr. 61 11. júní 1938, skal greiða skatt af skemmtunum fyrir almenning, öðrum en héraðsmótum ungmennafélaga, sem haldnar eru í Bólstaðarhlíðarhreppi og aðgangur er seldur að, og ekki eru undanþegnar skatti með lögum.

## 2. gr.

Þessar skemmtanir eru skattskyldar og flokkast þannig:

## 1. flokkur:

- a. Hljómleikar og söngskemmtanir.
- b. Sjónleikir.
- c. Kappleikir og íþróttasýningar, sem aðrir en áhugamenn taka þátt í.
- d. Fyrirlestrar og upplestrar.

## 2. flokkur:

- a. Dansleikir.
- b. Danssýningar.
- c. Loddara- og fjölleikasýningar.
- d. Aðrar almennar skemmtanir, sem aðgangur er seldur að og ekki eru taldar hér sérstaklega.

## 3. gr.

Af skemmtunum þeim, sem taldar eru í fyrra flokki, skal greiða 10% og 20% af skemmtunum í öðrum flokki. Ef skemmtun er margþætt, skal miða skattinn við þann þáttinn, sem hæst er skattaður.

## 4. gr.

Hreppsnefnd Bólstaðarhlíðarhrepps hefur eftirlit með að reglugerð þessari sé hlýtt, sér um innheimtu skattsins og er heimilt að hafa eftirlit með skemmtunum og sölu aðgöngumiða. Getur hún ráðið til þess sérstakan mann, er nefnist eftirlitsmaður skemmtana.

## 5. gr.

Hver sá, er halda vill skattskylda skemmtun, skal tilkynna oddvita eða eftirlitsmanni skemmtana, hvar og hvenær hún skuli haldin, og afhenda honum til stimpunar í tæka tíð alla þá aðgöngumiða, er nota á við skemmtunina.